

鍾
呂
二
仙
傳

黃魯曾撰

中
華
書
局

叢書集成初編所選寶顏堂秘笈收有此書故據以排印此書僅有黃魯曾撰鍾呂集序一篇施肩吾撰正陽真人鍾離公敘傳一篇田子撰純陽真人呂公敘傳及後序各一篇施田所撰三篇合題爲鍾呂敘傳而寶顏目錄則併鍾呂集序及鍾呂敘傳題爲鍾呂二仙傳黃魯曾撰今從之

鍾呂集序

門人曹子東告予曰。有鍾呂二僊集。知之乎。予鼓躍願覘。既而手得之。如星墜于空中。而愉快遇神人也。敬展一讀。乃知多歌詠之詞。考之禮曰。長言之不足。故歌詠之。言而至于歌詠。窮矣。凡言有祕而不發。值人接物。未嘗一易。及夫歌詠之間。不免呈吐。如其言之曲婉隱伏者。亦嘗宣泄。此鍾呂二僊之言。所以當寶異而體玩之也。觀其所謂嬰兒姪女。赤子黃婆。黃芽白雪。神室寶花。離位坎胎。聖域神胞。金虎火龍。七返九還。丹元紫氣。石肝雪液。紅蓮朱橘。七陰一陽。尋三聚五。雖皆藏訣。韜真寓形。假物而不覺其發揮之半。教示之幾。有神智者特出焉。不必論之。其次有待于佑啓而致曲焉者。則因其沈密之詞。味其潛精之旨。且相轉領于世華。改心于俗態。歆慕于清遠之居。聳企于寥廓之遊者。蓋有之也。噫。知所先後。則近衛矣。天下豈有依依繚繚之多情。若利鋒不能割乎。固革焉者。而能絕時逸世耶。此二僊之書。所以有益于斯人之向入者也。矧彼學仙道者。代代華名。時時燦迹。其心行太高。擲二字于一羽。識見至達。投兆物于纖塵。所以神契聖流。妙孚玄子。其相軋類動之秘。有不可以與知之者。但坐判仙凡。立分遠邇。甘泯塵汗。何能一得。必于是書。手挾不舍。熟讀有絕韋之勳。目覽無窮。沈思有書紳之切。庶乎懇懇之誠。天人攜手。翹翹之想。神伍降心。始知鼎爲我鼎。藥爲我藥。星辰燦燦于五內。卦爻炳炳于一衷。萬歲之基。不出于四支之身。人真之地。不遠于七竅之心矣。由是循其言。若可以入其道。據其功。若可以融其天。凝滯之形。爲

超騰之禮。汚濁之命。造崇清之化。俯瞰生民。宛如蟲蛆之淳。濯于塗穢之中。而踊跳不息矣。則知向道者。可不以是書虔奉之。而恪習之歟。

鍾呂二仙傳

正陽真人鍾離公

明 黃魯曾撰

正陽真人復姓鍾離。名權。世號雲房先生。爲人魁梧。不知其始所以得道之因。初仕五代石晉朝。爲中郎將。統兵出戰西北土蕃。兩軍交鋒。忽天大雷電。風雨晦冥。人不相覩。兩軍不戰自潰。鍾離獨騎奔逃山谷。迷失道路。夜進深林幽澗。期以全生。乃遇一胡僧。髮頭拂額。體草結之衣。引行數里。到一村莊。曰。此東華先生成道之所。將軍可以歇泊。揖別而退。鍾離未敢驚動莊中。良久。忽聞人語云。此碧眼胡僧。饒舌相撓。莊中人披白鹿裘。扶青藜杖。抗聲前曰。來者非晉將軍鍾離權否。鍾離應曰。是。老人復曰。爾何事不寄宿山僧之所。鍾離聞而大驚。何以知我前來子細。必異人也。是時已失虎狼之威。有鸞鶴之志。不覺回心向道。哀求度世之方。於是東華先生授以長生真訣。靈寶畢法之秘。且曰。內丹旣成。當求外丹。以點化凡軀。且在塵寰積功累行。以待天詔。後度呂純陽於終南山。則真人以證僊果。是時僊脉得人。諸天稱慶。真人出入於丹霄紫府間。世益莫知其出處矣。其玄言秘訣。多有遺於後世。惟三十九章尤爲顯著云。華陽真逸施肩吾謹序。

純陽真人呂公

余始習儒學。次好性宗。修天爵而棄人爵。鄙頑空而悟真空。人爵徒止於人事。頑空不離於因緣。余乃志慕逍遙。心遊雲水。尋師訪友。往來不憚驅馳。遠問近參。始終不生懈怠。陰陽升降。默取法於二儀。性命根

基乃歸元於一氣。無形無象來時止。一婦一夫。有姓有名。去後存三男三女。九宮臺畔。令金男採取黃芽。十二樓前。使玉女收成白雪。水中起火。頂分八卦之爻。陰內煉陽。次別九州之氣。三花和會。化火龍而奮出。昏衢千日。功成。驂鶴馭而徑歸蓬島。爭奈天機深遠。不敢輕言。聖道玄微。難爲直說。以平日見功之法。尊師已驗之効。構成口訣。願接後人同登妙道。若能信心苦志。終始如一。定返洞天。不迷塵世。因筆云爾。大唐多口山人田子鉞。

後序

予大唐丙子四月十四日生。於文宗時。應舉進士。凡三舉不第。因遊荆江。遇苦竹先生。傳得高奔上聖之法。壽七十歲。又遇太素真君。傳得太玄日月之法。又壽七十歲。復於終南山。遇鍾離先生。得成金丹太乙之功。吾初得道。年三十。左日角一黑鬚。頂華陽巾。身着白襴。腰繫皂帶。每遊江浙山川。爲是風清月白之地。神仙聚會之鄉。吾道惟度二人。第一郭上竈。第二趙仙姑。法名是何。皆吾弟子。似聞市人言。吾與黃龍參請賣墨貨藥。能飛劍取人頭。吾聞大笑。且慈悲博濟者道也。修而行之者仙也。彼釋氏頑空。坐守生老病死而已。有何可以參請吾之賣墨。必致息氣。蓋墨者默也。息氣者全神也。貨藥者。誓救羣生也。又有劍三口。與市人皆同。第一斬色慾。第二斬貪嗔。第三斬煩惱。非利刃凡劍也。又聞世人愛識吾之貌。而畫其像。既識吾之真。不如行吾之法。既行吾之法。不如行吾之功。汝若有志。不須見吾。世上自有至人。觀汝所行。默傳汝以成道。汝若無志。雖與吾携手抵足。同眠同起。不成道矣。田子洞寶書。